

- विधानसभा मांय राइट टू हेल्थ कानून रा नियमां रा बारा मांय तीखी बहस-विपख सदन ऊं वॉक-आउट कीनो ।
- केन्द्र सरकार औद्योगिक संबंध संहिता रा प्रावधान आसान बणावण सारु संशोधन बिल लोकसभा मांय पेश कीनो ।
- केन्द्रीय शिक्षा मंत्री धर्मेन्द्र प्रधान कह्यो-सरकार भणार्ई-लिखाई रा हलका मांय ए.आई. काम लेवण ने बधावो दे रही है ।
- प्रदेश मांय पारो चढ़बा ऊं ठंड रो असर कम पड़्यो ।

000

विधानसभा मांय आज 'राइट टू हेल्थ' कानून रा नियमां रा बारा मांय सत्ता पख अर विपख रा सदस्यां बीचे तीखी तकरार व्ही । प्रश्नकाल रे दौरान कांग्रेस रा हरिमोहन शर्मा कानी ऊं उठायी ज्या सवाल रा जवाब मांय स्वास्थ्य मंत्री गजेंद्र सिंह खीवसर कह्यो के फिलहाल 'मुख्यमंत्री आयुष्मान आरोग्य योजना' रा तैत राज्य री जनता ने मुफ्त इलाज रो सुबीतो दियो जा रह्यो है । वे राज्य री लारली सरकार माथे महज चुनावी फायदो लेवण सारु ओ कानून बणावण रो आरोप मांड्यो । ई री विपख रा सदस्य ज़ोरदार खिलाफत कीनी । विपख रा नेता टीकाराम जूली अर विधायक गोविंद सिंह डोटासरा कानून लागू करण री स्थिति साफ करण री मांग कीनी । ई मुद्दा माथे व्ह्या हंगामा बीचे कांग्रेस रा विधायक वेल मांय आ र नारा लगावण लाग्या । ई पाछे वे सदन ऊं वॉकआउट कर ग्या ।

000

राज्य विधानसभा री कार्य सलाहकार समिति सदन रो 19 फरवरी तांई रो कामकाज तय कर दीनो है । सरकारी मुख्य सचेतक जोगेश्वर गर्ग सदन मांय समिति रो प्रतिवेदन पेश कीना, जिण ने सगळां री मंजूरी ऊं मान लियो ज्यो । तय कार्यक्रम रे मुजब, आज अर काल पाछे 16 अर 17 फरवरी ने बजट माथे चर्चा चालती रेहवेला । 14 अर 15 फरवरी ने विधानसभा मांय छुट्टी रेहवेला । 17 फरवरी ने वित्तमंत्री दीया कुमारी बजट माथे बहस परां जवाब पेश करेला । ई पाछे 18 अर 19 फरवरी ने सदन मांय अनुदान मांगां माथे बहस पाछे वां ने पास करी जावेला ।

000

श्रम अर रोजगार मंत्री मनसुख मांडविया आज लोकसभा मांय औद्योगिक संबंध संहिता-संशोधन बिल-2026 पेश कीनो । वे कह्यो के ई रे ज़रिये साल 2020 री औद्योगिक संबंध संहिता ऊं जुड़्या मुश्किल प्रावधान आसान बणाया जावेला ।

000

केन्द्रीय शिक्षा मंत्री धर्मेन्द्र प्रधान कह्यो है के सरकार भणार्ई-लिखाई रा हलका मांय आर्टिफिशियल इंटेलिजेंस काम लेवण ने बधावो दे रही है । वे आज नई दिल्ली मांय भारत बोधन एआई सम्मेलन-2026 मांय बोल रह्या हा । श्री प्रधान कह्यो के ए.आई. ने तीसरी कक्षा ऊं ले र शोध रा लेवल तांई कोर्स मांय शामिल करी जावेला ।

000

राज्यपाल हरिभाऊ बागड़े विद्यार्थियां ऊं ज्ञान ने देश बणावण मांय काम लेवण बाबत कह्यो है । वे आज जोधपुर मांय जय नारायण व्यास विश्वविद्यालय रा 22वां दीक्षांत समारोह मांय बोल रह्या हा । राज्यपाल कह्यो के भणार्ई-लिखाई मांय नुवी तकनीक रो भारत रा मूल्यां सागे तालमेल ज़रूरी है । वे एआई ने इंसान रा दिमाग री ठोड़ काम लेवण रे बजाय इण ने मददगार रा तौर ऊं काम लेवण री राय दीनी । जळसा मांय 52

हजार 682 विद्यार्थियों ने स्नातक, स्नातकोत्तर अर शोध री उपाधियां दे र नवाजी ज्या। जळसा मांय 59 विद्यार्थियों रो सोना रा तमगा दे र मान करी ज्यो।

000

उपमुख्यमंत्री डॉ. प्रेमचंद बैरवा राज्य रा माली साल 2026-27 रा बजट ने 'विकसित राजस्थान' रो मजबूत रोडमैप बतायो है। वे आज जयपुर मांय खबरनवीसां सागे बातचीत कर रह्या हा। श्री बैरवा कह्यो के 6 लाख 10 हजार 956 करोड़ रुप्या रो ओ बजट गरीबां, नौजवानां, किसानां अर महिलावां ने समर्पित है। उपमुख्यमंत्री कह्यो के भणार्ई-लिखार्ई सारु 69 हजार करोड़ अर स्वास्थ्य हलका सारु 32 हजार 526 करोड़ रुप्या रो प्रावधान करी ज्यो है।

000

संसदीय कार्य मंत्री जोगाराम पटेल कह्यो के बजट मांय मांय बुनियादी ढांचा विकास अर निवेश ने बधावो देवण माथे खास जोर दियो ज्यो है।

000

काल विधानसभा मांय पेश करी ज्या प्रदेश रा बजट मांय राजधानी जयपुर रा बुनियादी ढांचा विकास अर जनता रा सुबीतां मांय बधोतरी ऊं जुड्या केई प्रस्ताव करी ज्या। जयपुर मांय आवण-जावण ने आसान बणावण सारु 1 हजार करोड़ रुप्या रा पैकेज रो ऐलान करी ज्यो। ई रा तैत अरण्य भवन ऊं जगतपुरा रेलवे ओवर ब्रिज तांई खंभां माथे करीब साढे चार किलोमीटर लंबी सड़क बणायी जावेला। अजमेर रोड माथे पुराणी चुंगी कने अंडरपास बणायो जावेला। दूदू ऊं लालसोट बीचे 675 करोड़ रुप्या खर्च ऊं नुवो हाई-वे बणायो जावेला। पीवण रा पाणी री पूर्ति और बेहतर बणावण सारु सूरजपुरा ऊं चाकसू तांई नुवी लेण बिछार्ई जावेला जिण ऊं करीब 20 लाख जणां ने फायदो मिलेला। आमेर हलका मांय सैर-सपाटा ऊं सुबीतां रा विकास अर जयपुर मांय 'सेंटर ऑफ एक्सीलेंस फॉर वॉटर मैनेजमेंट' खोलण रो ई ऐलाण बजट मांय करी ज्यो। ई सागे ई उद्योगां ने बधावो देवण सारु फागी अर चौमूं मांय नुवा औद्योगिक हलका विकसित कर्या जावेला।

000

उपमुख्यमंत्री अर वित्तमंत्री दिया कुमारी कानी ऊं काल विधानसभा मांय पेश करी ज्या बजट मांय न्यारा-न्यारा हलकां सारु करी ज्या ऐलाण बाबत् जनता मांय घणी खुशी है। हनुमानगढ़ जिला रा नौजवान वठे रा पॉलिटेक्निक कॉलेज मांय आवता दो साल मांय आईसीटी लैब बणावण, सड़कां बणावण अर किसानों सारु कर्ज ऊं जुड्या प्रस्तावां रो स्वागत कीनो है। झुंझुनूं जिला रा दोरासर मांय 'वॉर म्यूजियम' बणावण रा ऐलाण ऊं गांव वाळां मांय घणो उमाव है। ई सारु बजट मांय करीब छह करोड़ रुप्या रो प्रावधान करी ज्यो है। लोगां रो केहवणो है के ई फैसला ऊं न केवल शहीदां री याद ने मान मिलेला, बल्कि हलकां मांय सैर-सपाटा ने ई बधावो मिलेला।

000

बजट पाछे कोटपुतली-बहरोड जिला रा किसान ई घणा राजी है। किसान रमेश चन्द्र बतायो के ई बजट ऊं किसानां री आमदनी मांय बधोतरी व्हेला।

000

अमृत भारत स्टेशन योजना रा तैत डीग रेलवे टेशन मांय सर्कुलेटिंग एरिया रो विकास, आरक्षण काउंटर अर वेटिंग एरिया सरीखा सुबीता मुहैया करायी ज्या है। मुसाफिरां रा सुबीता सारु 12 मीटर लंबो फुट ओवर ब्रिज बणायी ज्यो है, प्लेटफॉर्म शैड ने और बधायी ज्यो है अर नुवी उद्घोषणा प्रणाली लगायी ज्यी है।

000

रेल मंत्रालय रींगस-सीकर बीचे दोवड़ी लेण बणावण री मंजूरी दे दीनी है। रेल मंत्री अश्विनी वैष्णव 50 किलोमीटर लंबी ई पटरी सारु 470 करोड़ रुप्या ऊं बत्ती रकम मंजूर कीनी है। दोवड़ी लेण बण जावण ऊं खाटूश्यामजी, सालासर अर जीणमाता जावण वाळां जातरूआं सागे सीकर अर लक्ष्मणगढ़ रा विद्यार्थियां ने ई फायदो मिलेला। ई सागे ई,

रीगस ऊं खाटूश्यामजी बीचे 18 किलोमीटर लंबी नुवी लेण रो काम ई चाल रह्यो है, ज्यीं माथे अढाई सौ करोड़ रुपया ऊं बत्तो खर्च आवण रो अंदाजो है।

000

प्रदेश मांय दिन अर रात री बगत पारो चढबा ऊं सर्दी रो असर अब धीरे-धीरे कम पड़बा लाग्यो है। घणखर ठोड़ां दिन री बगत तापमान 25 ऊं 30 डिग्री सेल्सियस बीचे नाप्यो जा रह्यो है। रात री बगत ई पारो 12 डिग्री सेल्सियस ऊं ऊंचो निकळ ग्यो है। काल चित्तौडगढ़ मांय सब ऊं बत्तो 31 डिग्री सेल्सियस तापमान दर्ज करी ज्यो, दूजी कानी सीकर जिला रा फतेहपुर मांय रात री बगत पारो 5 दशमलव 9 डिग्री सेल्सियस रा लेवल माथे नापी ज्यो। मौसम विभाग आवता कुछ दिन तापमान मांय 2 डिग्री सेल्सियस ताई री बघोतरी रा आसार जताया है।

000